



**2021-2**

28. juuni 2021

All. nr./notatnr.:

2020-324-0001-21

Sull./sagsbeh.: MALL

## **Kommunip sulisoq peersissinnaangilaa**

*Kommuneqarfik Sermersooq paaqqinniffiutimi ilaanni sulisoq peersinneqassasoq 2020-mi februarimi aalajangiivoq.*

*Peersitsineq sulisup Ombudsmandimut tamatuma kingornatigut naammagittaalliutigaa, taannalu misissuineramik aallartitsivoq.*

*Ombudsmandi isumaqarpoq kommuni suliami illua'tungiusup isumaanik tusarniaagami tamatumalu kingornatigut sulisumik peersitsigami arriippallaamik qisuariarsimasoq, kommunillu peersitsinerup pineqaatissiissutitut atornissaanut periarfissaq iluuseqarani ilatsiinnarnermigut annaasimagaa.*

*Ombudsmandip suliami manna pingaartillugu isiginarpaa, tassalu eqqartuussisarneq pillugu periaatsimi aalajangersimasoq sulisitsisup peersitsineramik pineqaatissiissutitut atuinissaminut periarfissaa ullualuinnanguit qaangiutiinnartut atorunnaarsinnaasoq. Ombudsmandip manna pingaartillugu aammattaaq isiginiarpaa, tassalu inatsisilerineq pillugu atuakkiani ilimagineqartoq sulisitsisoq sulisumik peersitserusuttoq sulisup pisussaaffimminik akisussaaffimminillu annertuumik kusanaatsumillu sumiginnaaneranik paasisaqarnermi kingornatigut pilertortorujussuarmik iliuuseqartussaasoq. Sulisitsisoq taamaaliunngikkuni pisumik pineqartumik peersitsinikkut pineqaatissiissutiginninnissaminut periarfissaminik iliuuseqarani ilatsiinnarneq pissutigalugu annaasaqassaaq.*

*Suliami pineqartumi kommunip pisumik ilungersunartumik paasisaqarneranit sulisup suliami illua'tungiusutut isumaanik kommunip tusarniaaneranut ullut 13-it ingerlasimapput. Tamatuma kingornatigut kommunip sulisumik peersitsiniarluni aalajangiinerata tungaanut suli ullut 15-it ingerlaqqissimapput. Ombudsmandi isumaqarpoq tassani sulisitsisup peersitsinermik atorfinitsitsitsarneq pillugu inatsiseqartitsineq tunngavigalugu pineqaatissiissutitut a-tuisinnaaneranut killissaq erseqqissumik qaangerneqartoq. Kommunip sulisumik peersitsisoqarnissaanik aalajangiinera Ombudsmandip tamanna tunngavigalugu isornartorsiorpaa.*

*Peersitsinissaq sioqqullugu pineqaatissiissutiginiakkatut eqqarsaatigineqartumut tunngaviusoq pillugu suliami illua'tungiusup isumaanik tusarniaat sulisitsisup suliarissavaa. Suliami illua'tungiusoq aalajangiinermut tunngaviusut tamarmiusut pillugit isummaminik tusarniaavigineqassaaq, paasissutissat pineqartut sulisitsisup pigigai paasissutissallu pineqartut sulisitsisup aalajangiinissaanut tunngaviusunut ilaasut suliami illua'tungiusup aamma nalunngereeraluarpaguluunniit. Suliami illua'tungiusup isumaanik tusarniaanermut tunngaviup eqqortuunerata qulakkeerneqarnissaa sulisitsisup taamatumunnga atatillugu pisussaaffigaa. Suliami pineqartumi taamatut pisoqarsimanngilaq. Innuttaasup suliami illua'tungiusup isummaminik ilaatigut eqqunngitsumik tunngaveqarluni tusarniaavigineqarnera sulisitsisup ilisimasimavaa. Tamanna Ombudsmandip taamatuttaaq isorisarialittut isigaa.*

*Kiisalu kommunip suliami illua'tungiusup isumaanik ilaatigut kukkusumik tunngaveqarluni tusarniaasimanerminik kingusinnerusukkut naqqiisimanginnera Ombudsmandip isornartorsiorpaa.*

*Ombudsmandip tamanna tunngavigalugu inassutigaa suliaq sulisup peersinneqarneranut tunngasoq kommunip suliareqqissagaa, Ombudsmandillu oqaatigisai isiginiarlugit sularissagaa.*

*(Oqaaseqaat 28. juuni 2021-meersoq, j.nr. 2020-324-0001)*

Ombudsmandip oqaaseqaataa:

## **1. Suut misissorpakka?**

**1.1.** Kommunip [innuttaasoq] peersissinnaaneraa imaluunniit pisinnaati-taaneq taanna kommunip iliuuseqarani ilatsiinnarnermigut annaasimaneraa misissorpara.

Kommunip suliami illua'tungiusup isumaanik tusarniaaneranut aalajangiine-ranullu pissusiviusutigut tunngaviusoq aammattaaq misissorpara.

**1.2.** [Innuttaasup] anarsaammik "Klyx"-imik nakorsamit allagartaqarani pi-neqarsinnaasumik najugaqartumut tunniussisimanini pissutigalugu [paaqqin-niffimmi] peqqissaanermi ikiortitut atorfimminit peersinneqarsimanera inger-latsinermik inatsiseqartitsinermi pisumut naapertuuttumik iliuuseqartussaa-nermik tunngavimmik unioqqutitsisuunersoq isummerfiginiarnagu aalaja-ngerpunga.

[Innuttaasup] kommunillu [innuttaasup] piffissanik suliffiusimasunik allat-tuiffii pillugit isumaqatigiinnginnerat isummerfiginiarnagu aammattaaq aala-jangerpunga. Ullormi kommunip "Kardex"-iani oqaatigineqartutut [innuttaa-sup] [paaqqinniffimmi] najugaqartumut anarsaammik "Klyx"-i-mik nakorsa-mit allagartaqarani pineqarsinnaasumik tunniussiffigisimasaani piffissanik su-liffiusunik allattuiffiup takutippaa [innuttaasoq] napparsimanini pissutigalu-gu sulisimangitsoq. [Innuttaasoq] ulloq taanna sulisimasoq piffissanik sulif-fiusimasunik allattuiffiup allap takutippaa.

Kiisalu [innuttaasup] peersitsinissaq siunertaralugu suliami illua'tungiusup isumaanik tusarniaanermi kommunip allagaanik 13. februar 2020-meersunik tigusaqarsimanani paasissutissiissutaa isummerfiginiarnagu aalajangerpunga.

Tamatumani oqaatigaara naammagittaalliuutitut sulianik uanga suliarinnitarnera malittarisassatut pingaernerpaatut allakkatigoortitsinermik tunngaveqarlunga ingerlattariga, taamaattumillu apersuinissannut periarfissaqarajungitsunga. Taamaalillunga uppersaasiussanik naliliiviginnivinnissannut periarfissaqanngilanga.

Oqaaseqaatiga imatut tulleriinnilerpara:

- Immikkoortoq 2. Suliap ingerlasimaneranik uanga paasinninnera
- Immikkoortoq 3. Inatsiseqartitsinikkut tunngavigisaq
- Immikkoortoq 4. Kommunip suliami illua'tungiusup isumaanik tusarniaanera isumaalu
- Immikkoortoq 5. Uanga naliliinera

Oqaaseqaatinni Danmarkimi atuakkiaasut inatsisilerinikkullu periaaseq arlallitsigut innersuussutigisarpakka, taakkunanimi Kalaallit Nunaanni inatsiseqartitsinikkut tunngaviup Danmarkimi inatsiseqartitsinikkut tunngavik pingaernerusutigut assigimmagu, tamannalu innersuussutinit taaneqartunit er-serpoq.

Suliap ingerlasimanerata allaaserineqarnera oqaaseqaammut tulliuvoq.

## **2. Suliap ingerlasimaneranik uanga paasinninnera**

**2.1.** [Innuttaasup] [paaqqinniffimmi] najugartuq anarsaammik "Klyx"-imik nakorsamit allagartaqarani pineqarsinnaasumik 14. november 2019-imi tunisimavaa.

[Innuttaasup] [paaqqinniffimmi] najugartumut anarsaammik "Klyx"-imik nakorsamit allagartaqarani pineqarsinnaasumik tunniussisimanera [paaqqinniffimmi] suliassaqarfiup pisortaata 31. januar 2020-mi paasisimavaa.

[Paaqqinniffimmi] suliassaqarfiup pisortaata kommunimi sulisoqarnermut immikkoortortaarfik 4. februar 2020-mi attaveqarfigaa, suliap qanoq iliuuseqarfiginissaanik ilitsersortinniarluni.

Suliassaqarfiup pisortaa kommunimi sulisoqarnermut immikkoortortaarfimmit 10. februar 2020-mi ilitsersorneqarpoq pisoq [innuttaasup] peersinneqarneranik pineqatissiissutigeqqullugu.

Kommunip suliami illua'tungiusup isumaanik tusarniaalluni allakkat [innuttaasumut] 13. februar 2020-mi tunniuppai, peersitsinissaq siunertaralugu.

Kommuni [innuttaasooq] peersinneqassasoq 28. februar 2020-mi aalajangiivoq.

[Innuttaasooq] [paaqqinniffimmi] suliassaqarfiup pisortaata pisumik 31. januar 2020-mi paasisaqarneranik [innuttaasup] peersinneqarnissaanik kommunip 28. februar 2020-mi aalajangiinerata tungaanut [paaqqinniffimmi] sulinerminik allangortitsinani ingerlatsiinnarpoq.

Taamaalilluni [innuttaasup] [paaqqinniffimmi] najugaqartumut anarsaammik "Klyx"-imik nakorsamit allagartaqarani pineqarsinnaasumik tunniussisimane-  
ranik kommunip paasisaqarneranik kommunip peersitsinissaq siunertaralugu [innuttaasup] suliami illua'tungiusutut isumaanik tusarniaanerata tungaanut ullut 13-it ingerlasimapput. Tamatuma kingornatigut [innuttaasooq] peersinneqassasoq kommunip aalajangiinerata tungaanut suli ullut 15-it - tassalu katillugit ullut 28 - ingerlasimapput.

Peersitsineq [innuttaasup] uannut 26. maj 2020-mi naammagittaalliuutigaa.

**2.2.** Kommunip [innuttaasoq] suliami illua'tungiusutut isumaanik pissutsit marluk pillugit 13. februar 2020-mi tusarniaavigaa, peersitsinissaq siunertaralugu. Ilaatigut anarsaammik "Klyx"-imik nakorsamit allagartaqarani pineqarsinnaasumik [paaqqinniffimmi] najugaqartumut tunniussisimanini ilaatigullu nakorsaammik "Natrium Klorid"-imik nakorsamit allagartaqarluni pineqarsinnaasumik [paaqqinniffimmi] najugaqartumut annaaraluni tunniussisimani pissutigalugu.

Suliami illua'tungiusup isumaanik tusarniaalluni allakkanit erserpoq [innuttaasup] [paaqqinniffimmi] najugaqartoq nakorsaammik "Natrium Klorid"-imik annaarlugu tunisimagaa.

[Innuttaasup] uannut oqaatigaa [paaqqinniffimmi] atorfeqartitaanermini unuakkut aalajangersimasumik pigaartuusarsimalluni, nakorsaatinillu angissusiliineq nammineq aqutarisimanngikkini.

[Paaqqinniffimmi] suliassa qarfiup pisortaata sulisoqarnermullu immikkoortortarfiup e-mailikkut allaffigeqatigiittarneranni allakkanit 13. februar 2020-meersunit erserpoq najugaqartup nakorsaammik "Natrium Klorid"-imik nakorsamit allagartaqarluni pineqarsinnaasumik nakorsamillu allagartaligaasumik eqqortumik angissusiligaasumik tunineqarsimanera suliassa qarfiup pisortaata suliami illua'tungiusup isumaanik tusarniaatitut allakkat [innuttaasumut] tunniunneqarnissaat sioqqullugu malugisimagaa, taamaakkaluartorli suliassa qarfiup pisortaata suliami illua'tungiusup isumaanik tusarniaatitut allakkat sularineqareersimasut atorusussimagai.

Taamaattumik uanga paasinninnera unaavoq kommunip peersitsinissaq siunertaralugu suliami illua'tungiusup isumaanik tusarniaalluni allakkat [innuttaasumut] 13. februar 2020-mi tunniussimagai, taamaaliornikkut [innuttaasup] suliami illua'tungiusup isumaanik ilaatigut kukkusumik tunngaveqarluni tusarniaavigineqartussaasoq nalunngikkaluarlugu.

Uanga paasinninnera aammattaaq unaavoq suliami illua'tungiusup isumaanik tusarniaanermi kukkuneq kommunip [innuttaasumik] peersitsiniarluni 28. fe-

bruar 2020-mi aalajangiinnginnermini naqqissimanngikkaa. Tamaatuttaa [innuttaasup] suliame illua'tungiusutut isummaminik pissusiviusut eqqarsaatigalugit ilaatigut kukkusumik tunngaveqarluni tusarniaavigineqarsimanera peersitsineq pillugu aalajangiinermi takuneqarsinnaanngilaq.

### **3. Inatsiseqartitsinikkut tunngavigisaq**

#### **3.1. Suliami illua'tungiusup isumaanik tusarniaasarneq pillugu ataasimut oqaatigisassat**

Pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8-mi, 13. juni 1994-imeersumi kingusinnerusukkut allannguu-teqartinneqartumi (matuma kingornatigut suliassat suliarineqartarnerat pillugu inatsimmik taaneqartartussami) § 19-ikkut aalajangersarneqarpoq oqartussaasoq, suliame aalajangiinnginnermini, suliame illua'tungiusup isumaanik tusarniaanissamat pisussaaffeqartoq. Suliami illua'tungiusup isumaanik inatsisikkut aalajangersagaasumik tusarniaasussaataaneq oqartussaasup nammineq sulisui eqqarsaatigalugit atorfinitsitsisarneq pillugu inatsiseqartitsineq tunngavigalugu iliuitsinut aalajangersimasunut aamma atuuppoq. Peersitsineq suliassat suliarineqartarnerat pillugu inatsimmi aalajangiinermik oqartarnerat aalajangiineruvoq, taamaattumillu suliame illua'tungiusup isumaanik tusarniaasarneq pillugu malittarisassat suliame taamaattumut aamma atuupput.

Suliami illua'tungiusup aalajangiissamaarnermut pissusiviusutigut tunngaviusunik ilisimasaqalernissaminut taakkulu pillugit oqaaseqaateqarnissaminut oqartussaasup aalajangiinnginnerani periarfissinneqarnissaa suliame illua'tungiusup isumaanik tusarniaanerup siunertaraa.

Suliami illua'tungiusup isumaanik tusarniaasussaataaneq suliassat suliarineqartarnerat pillugu inatsimmi § 19, imm. 1 tunngavigalugu atuuttarpoq oqartussaasup suliame pissusiviusut pillugit paasissutissanik aalajangersimasunik pigisaqarnera suliame illua'tungiusup ilisimanngippagu, paasissutissat taakku suliame illua'tungiusumut akornusiisuuppata – oqartussaasullu paasissutissa-

nik pineqartunik pigisaqarnera suliami illua'tungiusup ilisimassagaa ilimagi-  
neqarsinnaanngippat.

Atorfinitsitsisarneq pillugu inatsiseqartitsinermi iliuutsinut aalajangersimasu-  
nut, matumani peersitsisoqarnissaanik aalajangiineq ilanngullugu eqqarsaa-  
tigalugu, atatillugu suliassat suliarineqartarnerat pillugu inatsimmi § 19-imi  
suliami illua'tungiusup isumaanik tusarniaasarneq pillugu ataatsimut malit-  
tarisassaq suliami illua'tungiusup isumaanik annertusisamik tusarniaasarneq  
pillugu malittarisassamik inatsisikkut aalajangersagaanngitsumik tapertaler-  
neqartarpoq – tassuunalu aalajangersarneqarpoq suliami illua'tungiusoq -  
suliami pissusiviusut pillugit tusarniaanerup saniatigut – suliap inatsiseqartit-  
sinikkut uppernarsaasiussatigullu tunngavii pillugit aamma tusarniaavigine-  
qassasoq. Suliami illua'tungiusoq aalajangiinermut tunngaviusut tamarmiu-  
sut pillugit isummaminik tusarniaavigineqassaaq, paasissutissat pineqartut o-  
qartussaasup pigigai paasissutissallu pineqartut oqartussaasup aalajangiinis-  
saanut tunngaviusunut ilaasut suliami illua'tungiusup nalunngereeraluarpa-  
guluunniit.

Taamaattumik oqartussaasup pineqaatissiissutiginiakkatut eqqarsaatigine-  
qartumut tunngaviusoq pillugu suliami illua'tungiusup isumaanik tusarniaal-  
luni atorfeqartitaasumut allakkat makkuninnga imaqartut suliarissavai:

- Pissutsit oqartussaasup pingaartillugit isiginiagai,
- Oqartussaasup suliamik paasinninnerigallagaa,
- Uppernarsaatitigut naliliisoqarsimappat naliliinerit,
- Oqartussaasup suliami inatsiseqartitsinikkut apeqqutit pillugit isumaa, ma-  
tumani inatsisini malittarisassat suut atussamaarneqarnerat taakkualu su-  
liamut pineqartumut qanoq attuumassuteqarneri ilanngullugit eqqarsaati-  
galugit.

Suliami illua'tungiusup isumaanik tusarniaanermut tunngaviup eqqortuunera  
oqartussaasup qulakkiissallugu pisussaaffigaa.



Oluf Emborgip aamma Peer Schaumburg-Müllerip atuakkiaanni "Offentlig arbejdsret"-imi aappasaanik naqitertinneqartumi (2010-meersumi) quppernerit 51-52 aamma Niels Fengerip atuakkiaanni "Forvaltningsret"-imi siullermeertumik naqitertinneqartumi (2018-imeersumi) quppernerit 590-592 innersuussutigaakka.

### **3.2. Sulisitsisup suliani peersitsinernut tunngasuni iliuuseqarani ilatsiinnarnera**

Sulisoq pisussaaffimminik akisussaaffimminillu annertuumik kusanaatsumillu sumiginnaasimasooq sulisitsisooq isumaqaruni sulisumik peersitsinissaq toqqarsinnaavaa, tamanna sioqqullugu atorfinitsitsisarneq pillugu inatsiseqartitsinikkut allatigut iliuuseqanngikkaluarluni.

Sulisitsisooq sulisumik peersitsigaangat atorfeqartitaanermut tunngasut ilua'tungaannaaniit ingerlaannartumillu sunniuteqartumik unitsinneqartarput. Sulisup suliffik atorfeqarfigisani ingerlaannaq tamatuma kingornatigut qimasavaa, akissarsiallu aamma ingerlaannartumik unissallutik.

Peersitsineq taamaalilluni tassaavoq sulisumut inaarutaasumik akuliuffiusorujussuarmillu pineqaatissiineq, tassami akissarsiat sulisup inuunerani aningaasaqarnikkut tunngaviusut ingerlaannartumik siumullu ilimasaaruteqartoqariinngitsoq peerneqartarmata.

Inatsisilerinermi periaatsimi inatsisilerinerlu pillugu atuakkiani aalajangersimasumik ilimagineqarpoq sulisitsisooq sulisumik peersitserusuttoq sulisoq pisussaaffimminik akisussaaffimminillu annertuumik kusanaatsumillu sumiginnaaneranik paasisaqarnermi kingornatigut pilertortorujussuarmik iliuuseqartussaasoq. Taamaaliortoqanngippat sulisitsisup pisumik pineqartumik peersitsinikkut pineqaatissiissutiginninnissaminut periarfissaa atorunnaassaaq, sulisitsisup iliuuseqarani ilatsiinnarnera pissutigalugu.

Tamanna inatsisilerineq pillugu atuakkiani ilaatigut imatut allaaserineqarpoq:

“Aamma oqaatigineqassaaq peersitsineq pissutissaqartutut isigineqassappat ingerlaannavissumik qisuariartoqarnissaa pisariaqartoq. Sivikitsuinnarmilluunniit iliuuseqannginnikkut ilatsiinnartoqarnerani sulisitsisup atorfeqartitaasumik peersitsinissamut piginnaatinneqarnera annaaneqarsinnaavoq. Aalajangiisuusorlu aamma unaavoq peersitsinerup eqqortumik tunngaveqarluni pinissaa. Taamaattumik sulisitsisup pisoq soorunalimi sukumiinerusumik misissortariaqarjaa, atorfeqartitaasumullu oqaatigisariaqarlugu apeqqut peersitsinerup pissutissaqarnera qulaajarniarlugu misissorneqartoq.” (Ombudsmandeqarfimmi nutsigaavoq)

Oluf Emborgip aamma Peer Schaumburg-Müllerip atuakkiaanni “Offentlig arbejdsret”-imi aappasaanik naqitertinneqartumi (2010-meersumi) qupperneq 505 innersuussutigaa.

“Pisumi suliffeqarfik pisup sukumiinerusumik misissornissaanut aalajangersimatumik sivilissusilimmik piffissaqarpoq. Sulisoq pasineqarpat qisuariaateqartoqannginnerani pisut sukumiilluinnartumik misissorneqarnissaat pissusissamisoorsinnaavoq. Taamaaliornikkut suulluanngippallaartumik tunngaveqarluni peersitsinerit pingitsoortinneqarsinnaapput. Sukumiinerusumilli misissueqqinnerit taakku sukangaatsiartumik ingerlasussaananerit qularutissaanngilaq.” (Ombudsmandeqarfimmi nutsigaavoq)

Mikael Marstalip atuakkiaani “Bortvisning – suspension og fritstilling”-imi siulermik naqitertinneqartumi (2013-imeersumi) qupperneq 36 innersuussutigaa.

Sulisitsisoq iliuuseqarani ilatsiinnarneq pillugu isumaliutersuutiniq aporfeqassanngippat peersitsisoqarnissaanik aalajangiinerit taamaalillutik sapinngisamik pilertornerpaamik pisussaapput. Sulisitsisup tamatumunnga peqatigitillugu ingerlatsineq pillugu inatsiseqartitsinermi suliami illua’tungiusup isumalik tusarniaasarneq il.il. pillugit tunngaviit nalinginnaasut suli malittuassavai.

Sulisitsisoq pilertortorujussuarmik qisuarianngippat ilimaginninneq mannaasaaq pisoq ima kusanaatsigisimanngitsoq peersitsinerup qisuariaatigineqarnissaa pisariaqanngitsoq sulisitsisoq isumaqarsimassasoq.

Sø- og Handelsretsip eqqartuussutaani 20. december 2004-meersumi U. 2005.3471S-imi quppernermi 7-imi issuarneqartumi eqqartuussivik isumaqarpoq sulisitsisup sulisumik peersitsisinnaatitaanini ulluni 9-10-ni iliuuseqarani ilatsiinnarsimaneq pissutigalugu annaasimagaa. Ilaatigut makku eqqartuussummi oqaatigineqarput:

“[Sulisitsisup] peersitsisinnaatitaaneq iliuuseqarani ilatsiinnarnikkut annaasimavaa. Sulisitsisup ingerlaannartumik qisuariarnissaminut pisussaaffeqarnera ilmagineqarpoq. Qisuariaat peersitsinerusariaqanngilaq, tassaasinnaallunili peersitsisoqarsinnaanersoq sukumiinerusumik naliliiniarluni pissutsinik sulisumut tungasunik misissuisoqarnera pillugu ilisimatitsineq, [sulisorli] taamatut ilisimatinneqarsimanngilaq.

Tunngaviutinneqarsinnaavoq [sulisitsisoq] piffissami 19. november 2002-mit [sulisitsisup] allagaani 28. november 2002-meersuni soraarsitsinerup tungaanut arlaatigut misissuinerinik ingerlatsisimanngitsoq, tassami – nassuiaatigineqartutut – [sulisup] ilumoorfiginnittussaataanerminik unioqqutitsisimanera aallaqqaataaniilli qularutigineqarsimanngimmat. Taamaakkaluartoq ingerlaannartumik peersitsisoqarsimanngilaq - tunngavilersuutitaqanngitsumilli ulluni 9-10-ni utaqqisoqarsimalluni. Pissutsit paatsiveqanngitsut [sulisitsisup suliffeqarfiani] 2002-mi ukiakut atuuttut apeqqutip naliliivigineqarneranut sunniuteqanngillat.

[...]

Aalajangiinerni – pingaartumik eqqartuussutini pisoqaanerusuni – piffissaq sivi-sunerusoq atorlugu qisuariarnerit akuerineqarfiini tamatumunnga tunngavilersuut tassaavoq peersitsineq sioqqullugu sukumiisumik misissuinerit pisariaqartuusimanagerat.” (Ombudsmandeqarfimmi nutsigaavoq)

Vestre Landsretsip eqqartuussutaani 13. november 2012-imeersumi quppernermi 3-mi eqqartuussivik isumaqarpoq sulisitsisup sulisumik peersitsisinnaatitaanini iliuuseqarani ilatsiinnarneq pissutigalugu ullut tallimaannaat qaangiunneranni annaasimagaa. Ilaatigut makku eqqartuussummi oqaatigineqarput:

“[Sulisup] [sulisitsisoq] mailimi 29. april 2009-meersumi qinnuigaa allagaatit arlalilit atorfeqartitaanermut tunngasut nassuteqqullugit, tamannalu [sulisitsisup] mailikkut ulloq taanna akivaa. [Sulisoq] arfininngornermi 2. maj 2009-mi suliar torumanersoq [sulisitsisup] mailimi tassani apeqqutigaa, **[sulisitsisulli] atorfeqartitaanerup atorunnaarsinneqarnissaa ippassaammat pisimasoq pissutigalugu sukkulluunniit akunnattoorfissaqartinnagu.** (Uanga erseqqissaanera)

Atorfeqartitaaneq [sulisitsisup] aatsaat 4. maj 2009-mi atorunnaarsippaa, tamannalu aamma pivoq – 28. april 2009-mi pisumut innersuussinerup saniatigut – [sulisup] suliffimminut uteqqinnissaminik siunertaqannginnera tamatumalu kingornatigut napparsimanini pissutigalugu sulisinnaanngitsutut nalunaaruteqarnerata upperineqarsinnaannginnera tunuartinneqarneralu innersuussutigalugit.

Taamatut pisoqarsimanerani, tassalu [sulisitsisup] 28. april 2009-mi pisumik ingerlaannaq maluginnissimagaluarluni aatsaat allakkatigut 4. maj 2009-meersutigut soraarsitsisimanerani, isumaqarpugut [sulisitsisoq] iliuseqarani ima ilatsiinarsimatigisoq atorfeqartitaanermik 28. april 2009-mi pisoq tunngavigalugu atorunnaarsitsisinnaatitaanini annaasimasimallugu.” (Ombudsmandeqarfimminutsigaavoq)

Taamaalilluni eqqartuussisarneq pillugu periaatsimi aalajangersimavoq sulisitsisup peersitsineramik pineqaatissiissutitut atuinissaminut periarfissaa ulualuinnannguit qaangiutiinnartut atorunnaarsinnaasoq.

Sulisitsisup sulisoq peersissamaaruniuk iliuseq suna aalajangiinissaminut piareernissami tungaanut atorniarnarlugu isumaliutersuutigisariaqarpaa. Matumani sulisitsisup sulisumik suliunnaarallartitsineramik angerlartitsinermiluunniit toqqaanera sunniuteqangaatsiartussaagunarpooq. Sulisitsisup taamaaliornermigut suliaq ilungersunartorujussuartut isigigini sulisumut ingerlaannartumik takutissimassavaa. Sulisitsisoq taamaaliunngippat sulisorlu inaarutaasumik aalajangiisoqarnissaata tungaanut suliinnarpat tamatuma suliaq ilungersunannginnerusutut isigineqalersissinnaavaa.

Oluf Emborgip aamma Peer Schaumburg-Müllerip atuakkiaanni “Offentlig arbejdsret”-imi aappasaanik naqitertinneqartumi (2010-meersumi) qupper-

nerit 503-505 aamma Mikael Marstalip atuakkiaani "Bortvisning – suspension og fritstilling"-imi siullermik naqitertinneqartumi (2013-imeersumi) quppernerit 9, 15, 31 aamma 35-36 innersuussutigaakka.

#### **4. Kommunip suliami illua'tungiusup isumaanik tusarniaanera isumaalu**

**4.1.** Kommunimi sulisoqarnermut immikkoortortaqrarfiup e-mailit marluk [innuttaasup] suliami illua'tungiusutut isumaanik tusarniaalluni allakkanut mis-singiummik imaqtartut 12. februar 2020-mi aamma 13. februar 2020-mi [innuttaasup] suliami illua'tungiusutut isumaanik tusarniaaneq sioqqullugu [paaqqinniffimmi] suliassaqrarfiup pisortaanut nassiuppai.

Suliassaqrarfiup pisortaa kommunip e-mailianut 12. februar 2020-meersumut akissutitut sulisoqarnermut immikkoortortaqrarfimmut imatut allappoq:

"Pisarissersuina ajuusaarutigeqaara, nalunartulli pissutigalugit nakorsaat natrium klorid annertussusiliisarnerlu inimi nakorsaataasivimmi allamiittumi misissorpakka.

Ilumoorpoq [najugaqartoq] pinerit tamaasa sisamanik pisartussaasoq, tassami annertussusiliussa 250 mg-iuummat. Annertussusiliussa 500 mg. sungiusimaga-luarpaat.

Pisarissersuineq ajuusaarutigaa, **suliamili illua'tungiusup isumaanik tusarniaaneq ippassaq uannut nassiussat massakkut atuinnarpara.** [uanga erseqqissaanera] (Ombudsmandeqarfimmi nutsigaavoq)

Kommuni suliassaqrarfiup pisortaanut e-mailimi 13. februar 2020-meersumi tamanna tunngavigalugu imatut allappoq:

"Hej

**Ajunngilaq.** Misissueqqissimanerit suliamilu illua'tungiusup isumaanik tusarniaa-tip suliami illua'tungiusumut tunniunneqannginnerani kukkunermik paasisaqarne-

rit pingaernerpaajuvoq.” [Uanga erseqqissaanera] (Ombudsmandeqarfinmi nutsigaavoq)

[Innuttaasoq] suliami illua'tungiusutut isummaminik 13. februar 2020-mi tusarniaavigineqarpoq, peersitsinissaq siunertaralugu. Suliami illua'tungiusup isumaanik tusarniaalluni allakkani peersitsinermut tunngavittut ilaatigut makku oqaatigineqarput:

“[...]

Suleqatitta 10. februar 2020-mi paasivaa [paaqqinniffimmi] najugaqartoq nakorsaammik “Natrium Klorid”-imik iisartakkanik marlunnik ullormut marloriarluttit tunniussinikkut annaarlugu tunisimagit.

[...]

[Paaqqinniffimmi] najugaqartoq nakorsaammik “Klyx”-imik 14. november 2019-imi tunisimavat.” (Ombudsmandeqarfinmi nutsigaavoq)

**4.2.** Kommuni allakkatigut 3. juni 2020-meersutigut aamma 15. oktober 2020-meersutigut qinnuigaara [innuttaasup] [paaqqinniffimmi] peqqissaanermi ikiortitut atorfimminit peersinneqarnera sioqqullugu iliuuseqarani ilat-siinnarsimalluni kommuni isumaqarnera soq paasissutissiissutigeqqullugu.

Kommunip allakkatigut 1. december 2020-meersutigut akivaanga:

**“1. Sulisitsisup suliani peersitsinernut tunngasuni iliuuseqarani ilat-siinnarnera**

**1.1** Kommuneqarfik Sermersuumi Sulisoqarnermut Immikkoortortaqarfik [paaqqinniffimmi] suliasaqarfinmi pisortamit nutaamit 4. februar 2020-mi attaveqarfigineqarpoq, taassumalu paasissutissiissutigaa sulisumi sulinerannik nakkutillinnerminut atatillugu paasisimagini [innuttaasoq] najugaqartumut nakorsaammik nakorsamit innersuussaangitsumik nakorsaasiisimasoq.

**1.2** Sulisoqarnermut immikkoortortaqarfik pisortap nutaap saaffiginninnera sioqqullugu pisoq pillugu ilisimasaqarsimangilaq suliarlu nalilerniarlugu pisariaqar-

pallu pisoq kinguneqartinniarlugu siunnersuisoqarnissaanik kissaateqarluni. Siunnersiuinermi inerniliunneqarpoq pisoq imaannaangitsuusoq ilungersunarlungu, taamaattumillu kinguneqartinneqartariaqartoq. Kommunip suliami illua'tungiusup isumaanik tusarniaannginnermi pisoq pillugu saaffigineqareernermini uppernaarsaatit assigiinngitsut erseqqinnerusumik paaserusussimavai suliarlu naammattumik qulaajarusussimallugu. Suliap allaffigeqatigiittaqaarluni qulaajarneqarnera ullunik 21-nik sivilisussuseqarsimavoq, tamatumalu kingornatigut suliami illua'tungiusumut tusarniaalluni allakkat nassiunneqarlutik. Tamanna pivog, naak kommunip ilisimagaluaraa inatsiseqartitsinnermi manna aalajangersimasuusoq, tassalu sulisitsisoq sulisumik peersitserusuttoq sulisup sakkortuumik sumiginnaanerani paasisaqarnermi kingornatigut pilertortorujussuarmik iliuuseqassasoq. Taamaattumik kommuni isumaqarpoq suliami matumani kommuni sapinngisamik pilertornerpaamik iliuuseqarsimasoq." (Ombudsmandeqarfimmi nutsigaavoq)

**4.3.** Kommunimut saaffiginnissutinni 15. oktober 2020-meersumi kommuni taamatuttaaq qinnuigaara nakorsaammut nakorsamit allagartaqarluni pineqarsinnaasumut Natriumkloridimut tunngasut suliami illua'tungiusup isumaanik tusarniaalluni allakkanit ersertut pillugit nassuiaateqaqqullugu, tassami taakku aalajangiinnermi takuneqarsinnaanngimmata.

Kommunip 1. december 2020-mi ilaatigut imatut akivaanga:

## **"2. Suliami illua'tungiusup isumaanik tusarniaalluni allakkani pissusiviusut**

**2.1** Sulisoqarnermut immikkoortortaqaarfik aallaqqaammut pisortamit nutaamit ilisimatinneqarpoq suliami illua'tungiusoq nakorsaammik "Natrium Klorid"-imik annaarlugu nakorsaasiisimasoq, taamaattumillu paasisutissaq tamanna tusarniaalluni allakkanut ilanngunneqarluni. Tusarniaalluni allakkat suliami illua'tungiusumut nassiunneqareersullu sulisoqarnermut immikkoortortaqaarfiup paasivaa suliami illua'tungiusoq nakorsaammik qulaani taaneqartumik annaarinani nakorsaasiisimasoq.

**2.2** Tusarniaalluni allakkat naqqinneqanngillat, qulaani paasisutissiisutigineqartut tunngavigalugit tamatuma kingusinnerusukkut naliliinnermut ilaatinneqannginnissaa toqqarneqarmat, taamalu paasisutissat pigineqartut tunngavigalugit [innuttaasup] nakorsaatinik nakorsamit innersuussaangitsumik (klyx) nakorsaasiis-

simanera tunngavigalugu aalajangiisoqarluni.” (Ombudsmandeqarfimmi nut-sigaavoq)

## **5. Uanga naliliinera**

### **5.1. Kommunip iliuuseqarani ilatsiinnarnera**

[Innuttaasup] najugaqartumut “Klyx”-imik tunniussisimanerata kommunimit paasineqarneranit ullut 13-it qaangiuttut kommunip [innuttaasooq] suliami illua’tungiusup isumaanik tusarniaavigaa. Suliami illua’tungiusup isumaanik tusarniaanermi ullut 15-it qaangiuttut [innuttaasooq] peersinneqassasooq kommuni aalajangiivoq.

Uanga paasinninnera unaavoq sulisitsisoq sulisumik peersitserusuttoq sulisup pisussaaffimminik annertuumik kusanaatsumillu sumiginnaaneranik paasisaqarnermi kingornatigut pilertortorujussuarmik iliuuseqartussaasooq. Sulisitsisup inatsiseqartitsinikkut qisuariarnissaminut piffissaliusaaq sivikitsoq taanna sulisup suliunnaarallartinneratigut suliunnaarsinneqarneratigulluunniit sivit-sorsinnaagunarpaa. Sulisitsisoq taamaaliunngikkuni pisumik pineqartumik peersitsinikkut pineqaatissiissutiginninnissaminut periarfissaminik iliuuseqarani ilatsiinnarneeq pissutigalugu annaasaqassaaq. Tamatumunnga pissutaa-voq taamaattoqarpat ilimaginninneq unaassasooq sulisitsisoq isumaqarsimasooq pisoq peersitsinermik atorfinitsitsisarneeq pillugu inatsiseqartitsineq tunngavigalugu atuinissamik pisariaqartitsilersutut pisariaqarneratut annertususeqanngitsoq.

Uanga paasinninnera unaavoq tamatuma erseqqissarnissaanut atuakkiani inatsiseqartitsinikkullu periaatsini naammattunik tunngavissaqartoq. Immikkoortoq 3.2 innersuussutigaa.

Tamanna tunngavigalugu uanga paasinninnera unaavoq [innuttaasup] nakorsamit allagartaqarani pineqarsinnaasumik “Klyx”-imik najugaqartumut tunniussineranik kommunip ilisimasaqalerneranit kommunip [innuttaasumik] suliami illua’tungiusup isumaanik tusarniaaviginninneranut ullut 13-it tassan-galu kommunip suliami illua’tungiusup isumaanik tusarniaareerluni [innut-



taasumik] peersitsineranut ullut 15-it ingerlasimanerat kommunip peersitsinermik atorfinitsitsisarneq pillugu inatsiseqartitsineq tunngavigalugu pineqaatissiissutitut atuisinnaaneranut killissamik qaangiinerusoq erseqqissoq.

Suliap ingerlanerani atorfinitsitsisarneq pillugu inatsiseqartitsineq tunngavigalugu qisuariaatinik allanik, soorlu suliunnaarallartitsinermik angerlartitsinermilluunniit kommunip atuisimanginnera tamatumani pingaartillugu isiginiarpara. [Innuttaasorli] suliunnaarsitsineq tikivillugu [paaqqinniffimmi] suliaminik kommunimit ingerlatsisiinnarneqarsimavoq.

Oqaatigaara piffissaq [paaqqinniffimmi] suliassa qarfiup pisortaata kommunimi sulisoqarnermut immikkoortorta qarfimmik akuliutisitsiffia (4. februar 2020) immini sunniuteqanngitsoq.

Oqaatigaarattaq kommuni iliuuseqarani ilatsiinnarsimanersoq naliliinermi kommunip suliami pineqartumi sapinngisaminik pilertornerpaamik iliuuseqarsimalluni isumaqarnera sunniuteqanngimmat.

Taamaalillunga pisoq [innuttaasup] peersinneqarneranut pissutaasoq kommunip 31. januar 2020-mili paasereersimagaluarlugu [innuttaasup] [paaqqinniffimmi] peqqissaanermi ikiortitut atorfiniminit peersineqarnissaanik 28. februar 2020-mi aalajangiisimanagera isorisarialittut isigaara.

## **5.2. Suliami illua'tungiusup isumaanik tusarniaaneq pissusiviusutigut eqqunngitsumik tunngaveqartoq**

Suliami illua'tungiusup isumaanik tusarniaalluni allakkat 13. februar 2020-meersut [innuttaasup] peersinneqassamaarneranut pissusiviusutigut tunngavimmik kukkusumik ima qarput.

Kommunip [paaqqinniffimmilu] suliassa qarfiup pisortaata e-mailikkut 12. aamma 13. februar 2020-mi allaffigeqatigiinneranni allagaasimasut takutip-paat pissusiviusut pillugit paasissutissat kukkusut suliami illua'tungiusup isumaanik tusarniaalluni allakkat [innuttaasumut] nassiunneqannginneranni suliassa qarfiup pisortaanit paasineqarsimasut. Taamaakkaluartoq suliami illua'-

tungiusup isumaanik tusarniaalluni allakkat siusinnerusukkut tiguneqartut atuinarniarlugit suliassaqarfiup pisortaa aalajangerpoq, tamannalu kommunimi sulisoqarnermut immikkoortortaqarfiup akueraa.

Taamaalilluni eqqunngilaq kommunimi sulisoqarnermut immikkoortortaqarfik uannut nassuiaammuni 3. december 2020-meersumi oqarmat kukkuneq sulisoqarnermut immikkoortortaqarfiup suliama illua'tungiusup isumaanik tusarniaalluni allakkat [innuttaasumut] nassiunneqarnerisa kingornatigut aatsaat malugisimagaa.

[Innuttaasup] suliama aalajangiinermut tunngaviusunik tamarmiusunik suliama illua'tungiusutut isummaminik tusarniaavigineqarnissaa suliamilu illua'tungiusup isumaanik tusarniaanerp eqqortuunissaa kommunip qulakkiissallugu pisussaaffigaa. Taamatut pisoqarsimanngilaq. Tamanna kommunip suliama illua'tungiusup isumaanik tusarniaalluni allakkat [innuttaasumut] tunniunneqarnerat sioqqulluguli ilisimasimavaa.

Tamanna isorisarialittut isigaara.

### **5.3. Kommunip naqqiissuteqannginnera**

Uanga paasinninnera unaavoq kommunip sulisoq suliama illua'tungiusup isumaanik tusarniaammik pissutsimik kommunip atuuttussaataitanik sulisumut pineqartumut nanertuutaasumik imaqartumik nassiussivigisinnaanngikkaa, pisoq pineqartoq eqqortuunngitsoq kommunip nassiussineq sioqqullugu paasippagu.

Uanga paasinninnera unaavoq kommunip pissuviusut pillugit paasissutissat eqqortuunnginnerat suliama illua'tungiusup isumaanik tusarniaaneq atorfeqartitaasumut nassiunneqareersoq aatsaat paasiguniuk atorfeqartitaasoq tamatumingna pisariaqanngitsumik kinguarsaanani ilisimatittariaqaraa, kukkunerlu paasineqartoq suliama illua'tungiusup isumaanik tusarniaanermut aallartinneqarsimasumut qanoq sunniuteqassasoq kommuni isumaqartoq oqaatigisariaqaraa. Suliama illua'tungiusup isumaanik tusarniaaneq nutaaq kommunip atorfeqartitaasumut pisut qanoq issusiat apeqqutaatillugu nassiutariaqarpaa.

Kukkuneq suliap inaarutaasumik suliarineqalereernerani kommunimit aatsaat paasineqarpat atorfeqartitaasoq tamatuminnga aamma ilisimatinneqartariaqarpoq. Kommuni naliliippat suliami illua'tungiusup isumaanik kukkuneq paasineqartoq tunngavigalugu nutaamik tusarniaanerup aallarnisarneqarnissaa pisariaqanngitsoq, kommuni aalajangiinermi kukkuneq pillugu nassuiaateqartariaqarpoq, pisup pineqartup atorfinitsitsisarneq pillugu inatsiseqartitsineq tunngavigalugu pineqaatissiissutitut toqqarneqartumut sunniuteqarsimannginnera paasissutissiissutigalugu.

Imatut paasivara kommuni suliami illua'tungiusup isumaanik tusarniaaneq kukkusoq tunngavigalugu [innuttaasoq] eqqarsaatigalugu iliuseqarsimanngitsoq. Suliami illua'tungiusup isumaanik tusarniaaneq tunuartinneqarani luunniit naqqinneqarsimanngilaq. [Innuttaasorlu] suliami illua'tungiusup isumaanik tusarniaanerup ilaatigut kukkusumik tunngaveqarneranik sukkuluunniit paasitinneqarsimanngilaq. Kommunip kukkuneq kingusinnerusukkut naliliinermi ilaatinngiinnarsimavaa. Kommuni peersitsisoqassasoq tunngavisat sinneri tunngavigalugit aalajangiisimavoq, tunngavik kukkusoq taanagu.

Kommuni pisoq pillugu oqaaseqaateqaqqulluni qinnuigiganni aatsaat kukkuneq pillugu oqaaseqaateqarpoq.

Tamanna isorisarialittut isigaara.

#### **5.4. Malitseqartitsineq**

Suliaq [innuttaasumut] tunngasoq kommunip suliareqqissagaa suliarlu oqaatigisakka tunngavigalugit suliarissagaa inassutigaa.

Kommuni qinnuigaara oqaaseqaatiga inassutigalugu kommunip qanoq iliuseqarnissaanut pissutissaqalersitsinersut ilisimateqqullunga.

## **SULIAP INGERLASIMANERATA ALLAASERINEQARNERA**

Kommunip najugaqartoq pineqartoq pillugu "Kardex"-ianit ilaatigut makku erseput:

"[...]

14/11

1. novemberimili ananngilaq, klyx-imik tuninikuugaluarpog (itikkut manngut-tagag anamut aqilisitsisartoq) iluaqutaanngitsumilli. Anniarnini pequtigalugu suleqataasinnaanngilaq, kivinniaraluarparput iluaqutaanngitsumilli. Anaraveeqqavog manngertittoorujussuaqqalluni. Ajoqusersimasut nakorsiartarfiat attavigineqarpoq, movicol-itussaaq (imertagag anassamut aqilisitsisartoq) ulumi, taassumalu kingorna sap. akunneranut marloriarluni.

[Innuttaasup aqqisa aallaqqaataat]"

[Paaqqinniffimmi] suliaasaqarfiup pisortaata e-maili kommunimi sulisoqarnermut immikkoortortaqarfiup sulisuanut 4. februar 2020-mi nassiuppa. E-mailimit tassannga ilaatigut makku erseput:

"[...]

Matumani alla klyximik nakorsamit allagartaliisoqanngitsoq tunniussisimavog. Kakkiussami qupperneup naanerani aappaluttumik allassimavog. Naqinnerit aq-qit aallaqqaataat atorneqartut tassaapput [innuttaasup aqqisa aallaqqaataat] peqqissaanermi ikiortitut ilinniarsimasog, taamalu suliami allami pineqartumit annertunerusumik akisussaaffeqarlunilu qaffasinnerusumik ilinniagaqarsimasog.

Tamanna tallimanngornermi 31.1-imi paasivara, sulilu oqaloqatiginagu [innuttaasog].

Pisog qanog suliarissaneriga siunnersuutissaqarpit, massakut peersitsinermik allamik aamma suliaqarnitsinni." (Ombudsmandeqarfimmi nutsigaavog)

Sulisoqarnermut immikkoortortaqarfiup ilaatigut makku 10. februar 2020-mi oqaatigai:

“[...]

[Innuttaasoq] peqqissaanermi ikiortitut ilinniarsimasutut aalajangersimasumik akisussaaffeqarpoq, eqqortitassaminik. “Eqqortumik nakorsaasersuineq – paaqqutarinniffiit najugaqatigiiffiillu sakkussaat, akisussaaffiit, isumannaallisaaneq suliassallu”-mi quppernermi 4-mi ilaatigut allassimavoq nakorsaatinik allattuiffimmi *nakorsaatit nakorsamit allagartaqarluni pineqarsinnaasut* nakorsaatillu niuertarfimmi pisarineqarsinnaasut ilanngullugit allattorneqartassasut, kiisalu “Akisussaaffik nakorsaasiinissamullu pisinnaatitaaneq + pn nakorsaatit”-mi peqqissaanermi ikiortip suliassaasa ataanni allassimavoq pineqartup *nakorsaatit kuerassagai/immiutissagai* aamma *nakorsaatit nakorsamit allagartaligaasut* tunniuttassagai. Tassa imaappoq nakorsaatit [innuttaasup] tunniussai nakorsamit TUNNIUTEQQUSAASASUT. Qppersakkassinni quppernermi 10-mi aamma allassimavoq ikiortit nakorsaatinik kueraagaangamik nakorsaatinillu najugaqartunut tunniussigaangamik nakorsap nakorsaatinik tunniusseqqusisup ikiortaattut iliuseqartartut.

Taamaattumik ilitsersorusuppassi [innuttaasoq] peerseqqullugu.

Taamaattorli ilissinnut malugeqquniarpara qppersakkassinni quppernermi tassaani, tassa quppernermi 10-mi, imaattunik allassimasoqarmat: Nakorsaaserinerup suliatigut illersorneqarsinnaasumik piareersarneqarnissaa sulisullu nakorsaaserinermik ilinniartinneqarnermittut isumaginninnissaat paaqqutarinniffiup najugaqarfiillu pisortaqatigiivisa akisussaaffigaat.” (Ombudsmandeqarfimmi nutsigaavoq)

Sulisoqarnermut immikkoortorta qarfiup ilitsersuina suliassa qarfiup pisortaata 11. februar 2020-mi imatut akivaa:

“[...]

Tamanna ilumoorpoq, uagullu maani immikkoortorta qarfitsinni peqqissaanermi ikiortivut eqqortumik qanoq nakorsaasersuinissaannik ilinniartippavut, nakorsaaserinermilu najoqqutassaq sulisut inaanniippoq nakorsaataasivimmiillunilu.

[Innuttaasup] qaffasinnerusumik ilinniagarsimaneranik taamalu nakorsaaserinermik ilisimasaqarnerullunilu annertunerusumik akisussaaffeqarneranik oqarninni

isumaqatigilluinnarpakkit. Aamma nalunngilaa nalorniguni tunuarsimaartussaluni, tamanna ilinniagaani ilaavoq.

Peersinneratigut ingerlariaqqikkusuppunga.

Massakkumiit qanoq iliussaanga?" (Ombudsmandeqarfimmi nutsigaavoq)

Tamatuma kingornatigut suliassaqrarfiup pisortaa sulisoqarnermullu immikkoortortaqrarfik taaguutit suliamut tunngasut il.il. qulaajarniarlugit e-mailikut allaffigeqatigiittarput.

Sulisoqarnermut immikkortortaqrarfiup e-maili suliassaqrarfiup pisortaanut 12. februar 2020-mi nal. 17:39 nassiuppaa, suliami illua'tungiusup isumaanik tusarniaanermi allakkat ilanngullugit. E-mailimi tassani ilaatigut makku oqaatigineqarput:

"[...]

Aana partshøring. Atuarialugu iluarsisassaqrarpat iluarsinnassavat.

Aqagu pisariaqartissagukku [innuttaasup] oqaloqatiginnginnerani sianernissannut tikilluaqqusaavutit."

Sulisoqarnermut immikkoortortaqrarfiup e-maili alla suliami illua'tungiusup isumaanik tusarniaanermi allakkanik ilaqartinneqartoq suliassaqrarfiup pisortaanut 13. februar 2020-mi nal. 12:48 nassiuppaa. E-mailimi tassani ilaatigut makku oqaatigineqarput:

"[...]

Aana [innuttaasumut] tusarniaassut allagaq.

Allakkami henviserfigisara håndbog bilagitut ilanngullugu tunniutiinnassavat, allakkamilu allangortitassaqraruit iluarsinnassavatit."

Sulisoqarnermut pisortaata e-maili sulisoqarnermut immikkoortortaqarfimmut 13. februar 2020-mi nal. 13:53 nassiuppaa, e-mailimut 12. februar 2020-mi nal 17:39 nassiunneqartumut qisuariaatitut. E-mailimit tassannga ilaatigut makku erserput:

“Pisarissersuina ajuusaarutigegaara, nalunartulli pissutigalugit nakorsaat natrium klorid annertussusiliisarnerlu inimi nakorsaataasivimmi allamiittumi misisorpakka.

Ilumoorpoq [najugaqartoq] pinerit tamaasa sisamanik pisartussaasoq, tassami annertussusiliussa 250 mg-iummat. Annertussusiliussa 500 mg. sungiusimaga-luarpaat.

Pisarissersuineq ajuusaarutigaara, suliamili illua'tungiusup isumaanik tusarniaaneq ippassaq uannut nassiussat massakkut atuinnaara. (Ombudsmandeqarfimmi nutsigaavoq)

Sulisoqarnermut immikkoortortaqarfiup e-maili imaattoq ulloq taanna, 13. februar 2020-mi, nassiuppaa:

“Hej

Ajunngilaq. Misissueqqissimanerit suliamilu illua'tungiusup isumaanik tusarniaatip suliami illua'tungiusumut tunniunneqannginnerani kukkunermik paasisaqarnerit pingaarnepaajuvoq.” (Ombudsmandeqarfimmi nutsigaavoq)

Sulisoqarnermut immikkoortortaqarfik suliami allattuiffimmi ulloq taanna allappoq, tassanngalu ilaatigut makku erserput:

“[Paaqqinniffimmi] pisortaqa ataatni atsiortumut e-mailikkut allappoq Natrium Kloridimik angissusiliineq eqqortuusimasoq. Taamaattumik pisoq ataasiinnaavoq, tassa imaappoq “Klyx”-imut tunngasoq, “Natrium Klorid”-imut tunngasuunngitsoq. Taanna allanneqarpoq./[suliamik ingerlatsisup aqqisa aallaqqaataat] (Ombudsmandeqarfimmi nutsigaavoq)

Suliami illua'tungiusup isumaanik tusarniaanermi allakkanit 13. februar 2020-mi ullulerneqarsimasunit ilaatigut makku erserput:

"[...]

**Pisup ingerlanera.**

Ulloq 01. oktober 2019 sundhedsassistentitut [paaqqinniffimmi] atorfinippetit.

Ulloq 10. februar 2020 [paaqqinniffimmi] najugaqartoq nakorsaatinik "Natrium Klorid"-nik annertuallaartunik tunisimavat.

Ulloq 14. november 2019 [paaqqinniffimmi] najugaqartoq nakorsaammik "Klyx"-mik tunisimavat, nakorsamiik innersuunneqarnikuunngitsumik.

[...]

**Peqqutigineqartoq.**

Ulloq 10. februar 2020 suleqativit malugilersimavaa [paaqqinniffimmi] najugaqartoq nakorsaatinik "Natrium Klorid"-nik tunivallaarsimagit, ullormut marloriarlutit, iisartakkanik marlunnik.

Nakorsaatinik taakkuninnga tunisivallaarneq uummatip tillerneranut akuttoqatigiinngitsumik ingerlaleranerani kinguneqarsinnaavoq, ajornerpaaffianilu uummammik unittoormik kinguneqarsinnaalluni.

Atuagaaqqamik sanasoqarnikuuvoq najugaqarfinni atugassiamik ateqartumik: "Korrekt håndtering af medicin - et værktøj for plejehjem og bosteder." (Nakorsaatinik eqqortumik aqutsineq - utoqqaat illuanni najugaqarfinnilu sakkussa.) Atuagaaraq pinngitsoorani atuagassiannorlugu sanaajunikuuvoq, aqutsisuniillu paasissutissiissutigineqartuarterluni atuaqqunera pisariaqartuusoq, peqqussutigineqartarlunilu tamanna. Sulisut tamarmik paasitineqartarput ataatsimiinnerni, ulluinnarnilu atuagaaraq atuaqqullugu.

Atuagaaqqap sananeqarnerani anguniarneqarpoq utoqqaat illuini najugaqarfinnilu, tassani aamma [paaqqinniffik] pineqarpoq, nakorsaatinik eqqortut tunniunneqartarnissaat, atuakkallu imaraa aamma nakorsaatinik suliarinissaanut ilitsersuutit, tjecklisterlu sulisut qanorpiaq nakorsaatinik suliarissaneraat.

Sulisut nakorsaataarniarfimmik (apotek) nakorsaatinik tigusarpaat. Nakorsaatinik tiguuneranni sulisut misissussavaat nakorsaatinut paasissutissat tamarmik eqqor-



tuunersut, tassani aamma ilaavoq nakorsaaitit qanoq annertutigisut najugaqartumut tunniunneqassanersut. (bilagimi qupp. 6 takujuk)

Sulisup suliassarivaattaq nakorsaatinik kisitsineq, tassungalu atatillugu nakorsaaitit/iisartakkat amerlassusaat eqqortuunersut misissornissaat, tassa allaqqasuniittut amerlassusaasa assingi nakorsaatinut æskiniinnersut kisinnissaat. (bilagimi qupp. 7 takujuk)

Sulisuttaaq suliassarivaa aqussallugu nakorsaaitip najugaqartumut tunniunneqarissaa. Tassani misissorluarneqassaaq allaqqasut amerlassusaat malillugit æskinnut ikineqarsimanersut. (bilagimi qupp. 8 takujuk)

Qulaani eqqaaneqareersutut sundhedsassitentit atorfeqarputit. Sundhedsassitentit [paaqqinniffimmi] suliassarisaanni allaqqavoq nakorsaatinik ikioraaneq nakorsaatinillu tunioraaneq, nakorsaatinik innersuunneqarnikuusunik, suliassaasunullu ilaavoq aamma misissussallugu najugaqartunut nakorsaaitit eqqortut tunniunneqarsimanersut.

Atuagaaqqami erseqqissumik ilitsersuuteqaraluartoq sulisut qanoq iliornissaannik, iisartakkanik amerlavallaartunik najugaqartumut tunniussisimavutit.

Ulloq 14. november 2019 [paaqqinniffimmi] najugaqartoq nakorsaammik "Klyx"-mik tunisimavat. Kardex-imi (allattuiffimmi) [paaqqinniffimmiittumi] allassimavutit imatut: "1. novemberimili ananngilaq, klyx-imik tuninikuugaluarpoq (itikkut mannguttagaq anamut aqilisitsisartoq) iluaqutaanngitsumilli. Anniarnini pequtigalugu suleqataasinnaanngilaq, kivinniaraluarparput iluaqutaanngitsumilli. Anar naveeqqavoq manngertittoorujussuaqqalluni. Ajoqusersimasut nakorsiartarfiat atavigineqarpoq, movicol-itussaaq (imertagaq anassamut aqilisitsisartoq) ullumi, taassumalu kingorna sap. akunneranut marloriarluni."

Kivinniarnera uani imatut paasineqarpoq: Ingitillugu anarniarnera oqinnerulersillugu.

[Paaqqinniffimmi] najugaqartut paaqqutarisariaqartuupput peqqinnissaqarfimmiillu ilinniarsimasunik pisariaqartitsisuullutik. Ineqartut ilai napparsimasuupput nakorsaatinillu pisariaqartitsillutik. Nakorsaatinik atuissappata nakorsaaitit nakorsamiit innersuunneqarsimasuussapput, imatut paasillugu sulisut nakorsaatinik nakorsamiit innersuunneqanngitsunik tunniusseqqusaanngillat.

Atuagaaqqami qulaani taaneqartumi ilaatigut allaqqavoq: "*Nakorsaq nakorsaatinik innersuussisarpoq*", imatut paasillugu nakorsaq kisimi nakorsaatinik innersuussinnaavoq.

[Qulaani oqaatigineqartutut [paaqqinniffimmi] peqqissaanermi ikiortit atorfegartitaavutit. Peqqissaanermi ikiortip tassani suliassaa ilaatigut tassaavoq *nakorsaatinik innersuunneqarsimasunik* kuioraaneq, tassa imaappoq nakorsaait najugaqartunut tunniunneqartut tunniunneqartussatut innersuussaassasut.]

Qulaani taaneqareersutut [paaqqinniffimmi] najugaqartoq ullormut marloriarlutit iisartakkanik marlunnik amerlavallaartunik tunisarsimavat, nakorsaatinik "Natrium Klorid", amerlavallaanik tunisinermi kinguneqarsinnaasut, uummatip akuttogatiingitsumik ingerlaleranik, ajornerpaaffianilu uummammik unittoormik kinguneqarsinnaasumik. Atuakkami ilitsersuutit allaqqagaluartut, iisartakkanik amerlavallaanik tunisisimavutit, tamannalu aqutsisunninngaaniik atorfeqarninut annertuumik sumiginnaanertut nalilerneqarpoq.

Taassumalu saniatigut nakorsaatinik nakorsamik innersuunneqanngitsunik tunisisimerit aammattaaq atorfeqarninnik sakkortuumik sumiginnaanertut isigineqarpoq, taamaattumillu soraarsitaanissat anguniarlugu tusarniarneqarputit.

[...]"

Kommunip sulisuma ilaannut oqarasuaatikkut 20. august 2020-mi oqaatigaa kommuni [innuttaasup] suliami illua'tungiusutut isummaminik tusarniaavigineqarnerminut akissutaanik tigusaqarsimanngitsoq.

Kommuni tamatuma kingornatigut suliami aalajangiivoq. Aalajangiinermi 28. februar 2020-mi ullulernerqarsimasumit ilaatigut makku erserput:

"Aalajangiineq - sulisumut kinguneqarsinnaasut pissutsit - soraarsitsineq.

#### **AALAJANGIINEQ.**

Ullumi ulloq aallarnerfigalugu soraarsinneqarputit. Tamanna isumaqarpoq atorfeqarnerit unitsinneqartoq, aammalu akissarsiatit ullumimiik unitsinneqartut.

#### **PISUP INGERLANERA**

Ulloq 01. oktober 2019 sundhedsassistentit [paaqqinniffimmi] atorfinipputit.

Ulloq 14. november 2019 Pakkutami najugaqartoq nakorsaammik "Klyx"-mik tunisimavat, nakorsamiik innersuunneqarnikuunngitsumik.

### ***INATSISIT TUNNGAVIGINEQARTUT***

Soraarsitsinermut inerniliineq isumaqatigiisummi PINGAARNERMI Naalackersuisut aamma Sundhedsassistentit akornanni § 2 malillugu, aqutsisussaataitanermik tunngaveqarpoq, tassani sulisitsisup pisussaaffigimmagu aqutsinissani aammalu sulinermut aaqjissuinissani, aammalu sulinerup nammineq naliliinermi kingorna nammineq sulinermik atuinissani.

### ***PEQQUTIGINEQARTOQ***

Ulloq 14. november 2019 [paaqqinniffimmi] najugaqartoq nakorsaammik "Klyx"-mik tunisimavat. Kardex-mi (allattuiffimmi) [paaqqinniffimmiittumi] allassimavutit imatut: "1. novemberimili ananngilaq, klyx-imik tuninikuugaluarpoq (itikkut mannguttagaq anamut aqilisitsisartoq) iluaqutaanngitsumilli. Anniarnini peqqutigalugu suleqataasinnaanngilaq, kivinniaraluarparput iluaqutaanngitsumilli. Anarnaveeqqavoq manngertittoorujussuaqqalluni. Ajoqusersimasut nakorsiartarfiat attavigineqarpoq, movicolitussaaq (imertagaq anassamut aqilisitsisartoq) ullumi, taassumalu kingorna sap. akunneranut marloriarluni."

Kivinniarnera uani imatut paasineqarpoq, ingitillugu anarniarnera oqinnerulersillugu.

[Paaqqinniffimmi] najugaqartut paaqqutarisariaqartuupput peqqinnissaqarfimmiillu ilinniarsimasunik pisariaqartitsisuullutik. Ineqartut ilai napparsimasuupput nakorsaatinillu pisariaqartitsillutik. Nakorsaatinik atuissappata nakorsaatinik nakorsamiit innersuunneqarsimasussaapput, imatut paasillugu sulisut nakorsaatinik nakorsamiit innersuunneqanngitsunik tunniusseqqusaanngillat.

Atuagaaqqami qulaani taaneqartumi ilaatigut allaqqavoq: "*Nakorsaq nakorsaatinik innersuussisarpoq*", imatut paasillugu nakorsaq kisimi nakorsaatinik innersuussisinnaavoq.

[Qulaani oqaatigineqartut [paaqqinniffimmi] peqqissaanermi ikiortit atorfegartitaavutit. Peqqissaanermi ikiortip tassani suliassaa ilaatigut tassaavoq *nakorsaatinik innersuunneqarsimasunik* kuioraaneq, tassa imaappoq nakorsaatinik najugaqartunut tunniunneqartut tunniunneqartussatut innersuussaassasut.]

Nakorsaatinik nakorsamik innersuunneqanngitsunik tunisisimanerit aammattaag atorfeqarninnik sakkortuumik sumiginnaanertut isigineqarpoq.

Tusarniaareernerup kingorna Kommuneqarfik Sermersuup aalajangiuppaa soraar-sinneqarnissat ullumimiik atuutilersumik.

[...]"

[Innuttaasoq] uannut 26. maj 2020-mi naammagittaalliorpoq. Naammagittaalliummit ilaatigut makku erserput:

"[...]

Najugaqartoq uanga peqqissaanermi ikiortitut ikiussagaangakku ileqqorinngilara nammineerlunga aalajangiisarlunga, nakorsiartarfimmulli sianertarlunga, takana-nilu peqqissaasoq peqqissaanermiluunniit ikiorti isumasiortarlugit. Ilanngusaaq ta-kuuk. Tassani allassimavoq 14. november 2019-imi itikkut manguttakkamik anna-mik aqilisitsisartumik klyximik najugaqartoq tunisimagiga, sulinissamulli pilersaa-rut malillugu ulloq taanna napparsimasutut nalunaarsorneqarsimallunga. Nerisat arrioriartortarfiisigut nappaatilinnut immikkoortortami nakorsaaneq [SIK-mi suli-sumut] allassimavoq eqqumiigalugu klyx soraarsitaaninnut tunngaviutinneqar-mat, tassami sakkukitsuararsuummat kikkunnillu tamanit pisariaqartitsineq ma-lillugu atorneqarsinnaalluni, taamatullu aamma Danmarkimi nalinginnaasumik pi-siniarfinni pisiarinqarsinnaalluni. Clyoktyl pillugu paasissutissat allakkallu assili-neri ilannguppakka." (Ombudsmandeqarfinmi nutsigaavoq)

Kommuni 3. juni 2020-mi imatut allaffigaara:

**"Kommuneqarfik Sermersuup [innuttaasumik] peersitsinera**

[Innuttaasup] [paaqqinniffimmi] peqqissaanermi ikiortitut atorfimminit peersinne-qarnini uannut 26. maj 2020-mi naammagittaalliuutigaa.

Naammagittaalliuutip misissuineramik aallartitsinermut pissutissaqalersinnaanga naliliinissannut suli tunngavissaqanngilanga. Taamaattumik kommuni massakkut qinnuigaara suliami allagaatit tamaasa uannut nassiuteqqullugit.

Uanga suliamik pingaarnerusutigut paasinninnera tulliuttuni allaaseraara.

### **Uanga suliamik pingaernerusutigut paasinninnera**

[Innuttaasoq] peersinneqassasoq Kommuneqarfik Sermersooq allakkatigut 28. februar 2020-mi ullulernerqarsimasutigut aalajangiivoq.

Kommuneqarfik Sermersuup aalajangiineranit erserpoq [innuttaasoq] najugaqartuq "klyx"-imik 14. november 2019-imi tunisimagaa, "klyx"-ilu tassaasoq nakorsaat nakorsamit innersuussaangitsoq. Aalajangiinermit ilaatigut erserpoq "Nakorsaatiniq nakorsamik innersuunneqanngitsunik tunisisanerit aammattaaq atorfeqarninnik sakkortuumik sumiginnaanertut isigineqarpoq".

[Innuttaasup] uannut oqaatigaa najugaqartumut "klyx"-imik tunniussinnginnermini ajoqusersimasunut nakorsiartarfik tamatigut attaveqarfigisarsimagini.

[Innuttaasup] uannut aamma oqaatigaa peersitsisoqarnissaanik aalajangiineq siqqullugu mianersoqqussummik tigusaqarsimanani suliamilu illua'tungiusutut isummaminik tusarniaavigineqarsimanani. Kiisalu [innuttaasup] uannut oqaatigaa 14. december 2019-imi napparsimasimalluni taamaattumillu sulisimanani, najugaqartorlu "klyx"-imi ulloq taanna tunisimanagu.

Imatut paasivara 14. november 2019-imit Kommuneqarfik Sermersuup peersitsisoqarnissaanik 28. februar 2020-mi aalajangiinerata tungaanut qaammatit pingasut affallu missaat ingerlasimasut.

Tamatumunnga atatillugu Vestre Landsretsip eqqartuussutaa 13. november 2012-imeersoq kommunimut malugeqquara, tassani Vestre Landsret isumaqarpoq sulisitsisup sulisumik peersitsisinnaatitaanini ilatsiinnarneq pissutigalugu annaasimagaa. Suliami tassani sulisup iliuseqarneranit sulisitsisup iliuitsimik pineqaattissiissutiginninnerata tungaanut ullut arfinillit ingerlasimammata. Sulisitsisup atorfeqartitsinermik atorunnaarsitsinissani ilimasaarutigereersimangilaa.

### **Suliami allagaatit nassiuteqquakka**

Kommuneqarfik Sermersooq qinnuigaara suliami allagaatit tamaasa e-malikkut uannut nassiuteqqullugit. Suliami sulisumut [innuttaasumut] tunngasumi allagaatit tamaasa, kommuni SIK-mik attaveqarfiginnittarsimappat tassani allagaasimasut, allakkat e-mailillu tiguneqartut nassiunneqartullu, allakkiat, nalunaarutiginninnerit nalinginnaasumillu allattukkat tamaasa piumavakka."

Suliami allagaatit kommunimit 9. juni 2020-mi tiguakka, taakkunanilu kommunip allagai 4. juni 2020-mi ullulernerqarsimasut ilaapput, suliami allagaatit nassiunneqartut imaat pillugit nassuiaammik oqaaseqaammillu naatsumik imaqarput.

Kommuni 15. oktober 2020-mi imatut allaffigaara:

**“Kommuneqarfik Sermersuup [innuttaasumik] peersitsinera**

Suliami allagaatit Kommuneqarfik Sermersuup uannut allakkatigut 4. juni 2020-meersutigut kiisalu e-mailikkut 20. august 2020-meersukkut nassiussai massakut misissoreerpakka. Kommunip suliaataa 03.17-K08-74-20-mik normoqartoq innersuussutigaa.

Suli isumaqarpunga suliaq isummerfigisinnaassagukku paasissutissat pisariaqartut piginagit, taamaattumillu Kommuneqarfik Sermersooq qinnuigaara suliaq pillugu oqaaseqaateqaqqullugu.

Kommuneqarfik Sermersooq qinnuigaara immikkoortut pingasut suliami allagaatinik nassiunneqartunik misissuereerlunga uanga suliamik pingaarnertigut paasininnera pillugu nassuiaatima kingornaniittut immikkut isummerfigeqqullugit.

Oqaatigaara suliami sulisumut [innuttaasumut] tunngasumi allagaatit siusinnerusukkut tigusimangisakka uannut e-mailikkut 20. august 2020-meersukkut nassiunneqarmata. Allakkanni 3. juni 2020-meersuni kommunimut qinnutigisara imaattunik oqaasertaqartoq Kommuneqarfik Sermersuumut eqqaasitsissutigaa:

“Kommuneqarfik Sermersooq qinnuigaara suliami allagaatit tamaasa uannut e-mailikkut nassiuteqqullugit. Suliami sulisumut [innuttaasumut] tunngasumi allagaatit tamaasa, kommuni SIK-mik attaveqarfiginnittarsimappat tassani allagaasimasut, allakkat e-mailillu tiguneqartut nassiunneqartullu, allakkiat, nalunaarutiginninnerit nalinginnaasumillu allattukkat tamaasa piumavakka.”

./. [Innuttaasup] allagaasa ilanngussartaasalu assilineri ilanngullugit nassiuppakka.

## **Uanga suliamik pingaarnertigut paasinninnera**

[Innuttaasoq] peersineqassasoq Kommuneqarfik Sermersooq allakkatigut 28. februar 2020-mi ullulerneqarsimasutigut aalajangiivoq.

Kommuneqarfik Sermersuup aalajangiineranit erserpoq [innuttaasup] najugaqartoq "klyx"-imik 14. november 2019-imi tunisimagaa, "klyx"-ilu tassaasoq nakorsaat nakorsamit innersuussaangitsoq. Aalajangiinermi ilaatigut erserpoq "Nakorsaatnik nakorsamit innersuunneqanngitsunik tunisisimanerit aammattaaq atorfeqarninnik sakkortuumik sumiginnaanertut isigineqarpoq".

[Innuttaasup] uannut oqaatigaa najugaqartumut "klyx"-imik tunniussinnginnermini ajoqusersimasunut nakorsiartarfik tamatigut attaveqarfigisarsimagini.

Najugaqarfiup [paaqqinniffiup] aamma Kommuneqarfik Sermersuup e-mailikkut allaffigeqatigiinnerannit 2. februar 2020-meersumit erserpoq "klyx"-imik tunniussisarneq [paaqqinniffiup] 31. januar 2020-mi paasisimagaa.

Kommuneqarfik Sermersuup [innuttaasoq] peersitsissamaarnermik suliami illua'tungiusutut isumaanik suliami illua'tungiusup isumaanik tusarniaatitut allakkatigut 13. februar 2020-meersutigut tusarniaavigaa.

Imatut paasivara [paaqqinniffiup] "klyx"-imik tunniussisarnermik 31. januar 2020-mi paasisaqarneranit Kommuneqarfik Sermersuup peersitsisoqarnissaanik 28. februar 2020-mi aalajangiinerata tungaanut ullut suliffiusut 21-t ingerlasimasut.

[...]

**1.2.** Kommuneqarfik Sermersooq qinnuigaara – qulaani taaneqartut isiginiarlugit – kommuni [innuttaasumik] peersitsinermut atatillugu iliuuseqannginnermigut ilatsiinnarsimasoq kommuni isumaqarnerisooq nassuiaqqullugu.

## **2. Suliami illua'tungiusup isumaanik tusarniaalluni allakkani pissusiviusut**

**2.1.** Suliami illua'tungiusup isumaanik tusarniaalluni allakkani 13. februar 2020-meersuni tunngavilersuummit ilaatigut erserpoq [innuttaasup] paaqqinniffimmi najugaqartumut nakorsaammik "Natrium Klorid"-imik anginaarlugu tunniussisimanera [paaqqinniffiup] 10. februar 2020-mi paasisimagaa.

Tunngavilersuutilli ilaa taanna Kommuneqarfik Sermersuup aalajangiinerani 28. februar 2020-meersumi oqaatigineqanngilaq.

[Paaqqinniffiup] aamma Kommuneqarfik Sermersuumi ingerlatsiviup e-mailikkut allaffigeqatigiinnerannit 13. februar 2020-meersumit erserpoq pisumi pissusiviusut eqqornerisut [paaqqinniffiup] misissorsimagaa. [Paaqqinniffiulli] paasisimavaa nakorsaat pineqartoq eqqortumik annertussusilerneqarsimasoq, taamaattumillu suliami illua'tungiusup isumaanik tusarniaalluni allakkani tunngavilersuut eqqortuunngitsoq.

Tamatuma kingornatigut imatut paasisariaqarpara suliami illua'tungiusup isumaanik tusarniaalluni allakkat [innuttaasumut] tunniunneqannginnerminni naqqinneqarsima[nngit]sut.

**2.2.** Kommuneqarfik Sermersooq qinnuigaara tamanna pillugu nassuiaateqaq-qullugu.

[...]"

Kommunip akissutaa imaattoq 3. december 2020-mi tiguara:

**“1. Suliani peersitsinernut tunngasuni sulisitsisup iliuuseqarani ilatsiin-narnera**

**1.1** Kommuneqarfik Sermersuumi Sulisoqarnermut Immikkoortortaarfik najugaqatigiiffimmi [paaqqinniffimmit] suliasaqarfimmut pisortamit nutaamit 4. februar 2020-mi attaveqarfigineqarpoq, taassumalu paasissutissiisutigaa sulisumi sulinerrannik nakkutilliinerminut atatillugu paasisimallugu [innuttaasoq] najugaqartumut nakorsaammik nakorsamit innersuussaangitsumik nakorsaasiisimasoq.

**1.2** Sulisoqarnermut Immikkoortortaarfik pisortap nutaap saaffiginninnera sioq-qullugu pisoq pillugu ilisimasaqarsimanngilaq suliarlu nalilerniarlugu pisariaqar-pallu pisoq kinguneqartinniarlugu siunersiuisoqarnissaanik kissaateqarluni. Siunersiuinermi inerniliunneqarpoq pisoq imaannaangitsuusoq ilungersunarlunilu, taamaattumillu kinguneqartinneqartariaqartoq. Kommunip suliami illua'tungiusup [innuttaasup] isumaanik tusarniaannginnermi pisoq pillugu saaffigineqareernermini uppersaatit assigiinngitsut erseqqinnerusumik paaserusussimavai suliarlu



naammattumik qulaajarusussimallugu. Siumut utimullu allaqattaarluni suliap qulaajarneqarnera ullunik 21-nik sivisussuseqarsimavoq, tamatumalu kingorna suliami illua'tungiusumut tusarniaalluni allakkat nassiunneqarlutik. Tamanna pivog naak kommunip ilisimagaluaraa inatsiseqartitsinermili manna aalajangersimasuummat, tassalu sulisitsisoq sulisumik peersitserusuttoq sulisup sakkortuumik sumiginnaaneranik paasisaqarnermi kingornatigut pilertortorujussuarmik iliuuseqassasoq. Taamaattumik kommuni isumaqarpoq suliami matumani kommuni sapinngisamik pilertornerpaamik iliuuseqarsimasoq.

## **2. Suliami illua'tungiusup isumaanik tusarniaalluni allakkani pissusiviusut**

**2.1** Sulisoqarnermut immikkoortortaqarfik aallaqqaammut pisortamit nutaamit ilisimatinneqarpoq suliami illua'tungiusoq nakorsaammik "Natrium Klorid"-imik anertuallaamik nakorsaasiisimasoq, taamaattumillu paasissutissaq tamanna tusarniaalluni allakkanut ilanngunneqarluni. Tusarniaalluni allakkat suliami [innuttaasumut] nassiunneqareersullu Sulisoqarnermut immikkoortortaqarfiup paasivaa [innuttaasoq] nakorsaammik qulaani taaneqartumik nakorsaasiivallaarsimanngitsoq.

**2.2** Tusarniaalluni allakkani iluarsiiisoqanngilaq, qulaani paasissutissiissutigineqartut tunngavigalugit tamatuma kingusinnerusukkut naliliinermut ilaatinneqannginissaa toqqarneqarmat, taamalu paasissutissat pigineqartut tunngavigalugit [innuttaasup] nakorsatinik nakorsamit innersuussaannngitsumik (klyx) nakorsaasiisimanera tunngavigalugu aalajangiisoqarluni.

## **3. Pisunut naapertuuttumik iliuuseqartarnermik tunngavik**

**3.1** Suliamut matumunnga atatillugu pisunut naapertuuttumik iliuuseqartarnissamik tunngavik kommunip sukumiisumik isumaliutigisimavaa, oqaatigineqartutummi tamanna unioqqutitsinermut naapertuuttuussammat.

Aamma ilumoorpoq [innuttaasoq] [paaqqinniffimmi] sulinerminut atatillugu siusinnerusukkut uparuarneqaranilu allatigut mianersoqquneqarnikuunngimmat.

**3.2** Kommunip isumaliutaanut [innuttaasup] sumiiffinni innarluutillit imminnut isumagisinnaanngitsut najugaqarfianni atorfeqarsimanera tunngaviusimavoq. Sulisut suliaasa ilagaat najugaqartut taakku isumagissallugit, kiisalu aamma sulisut ilaasa aalajangersimasumik piginnaanillit nakorsanit innersuunneqartumik nakorsaasersuinissaq isumagisussaallugu. [Paaqqinniffik] nakorsatinik nakorsa-

nit innersuunneqartunik kikkut nakorsaasersuisinnaanerat kikkullu nakorsaasiisinaanginnerat pillugu erseqqissunik najoqqutassiaqarpoq, kiisalu aamma nalunaarsuivimmik "Kardex"-imik peqarluni, tassanilu sulisut allattarlugu najugaqartut kikkut piffissami aalajangersimasuni nakorsaaserneqarsimanersut, suut tamarmik nalunaarsorneqarnissaat uppernarsaatissaqarnissaallu siunertarlugu. [Paaqqinniffimmi] sulisut, suliassaqarfiup iluani ilinniagaqarsimagaluarunilluunniit, najugaqartunut **nakorsanit innersuunneqanngitsunik nakorsaaseequsaanngillat**. Tassa najugaqartut illersorniarlugit, kiisalu kukkusumik nakorsaasiinissaq pinngitsoorniarlugu. Tamannarpiarlu sulisup pineqartup [innuttaasup] unioqqutissimavaa." (Ombudsmandeqarfimmi nutsigaavoq)

Kommunip oqaaseqaataa 3. december 2020-meersoq tamatuma kingornatigut [innuttaasumut] suliame illua'tungiusumut taassuma isumaanik tusarniaatigineqarsimavoq, taassumalu oqaaseqaatai 15. januar 2021-mi tiguakka.

## Oqaaseqaammut malitseqartitsineq

Kommunip 8. juli 2021-mi ilisimatippaanga suliaq [innuttaasup] peersinneqarneranut tunngasoq suliareqqiniarlugu aalajangerluni, kommunillu aalajangiinera nutaaq 9. september 2021-meersoq tamatumunnga uiggiullugu ulloq taanna uannut nassiullugu. Tassannga erserpoq kommunip peersitsineranik isornartorsiuinera kommunip tusaatissatut tigusiimagaa innutaasullu soraarsinneqarnissaa toqqarsimallugu.

Kommunip suliassaqarfimmi sulisoqarnermik aqutsinermut tunngasumi ajornartorsiutit taassuma pissuseqatai pinngitsoortinniarlugit siunissami sulianik suliarinnittarnerup aqqissuunneqarnera eqqarsaatigalugu uannut 19. december 2021-mi ilaatigut makku nalunaarutigai:

“Kommunip tamatumunnga atatillugu suliniutit makku aallartisarsimallugit oqaatigisinnaavaa:

1. Sulisoqarnermut pisortap suliaq sulisoqarnermut immikkoortortaqarfimmi sulianik suliarinnittunut tamanut oqaloqatiginnissutigissagaa.
2. Sulisoqarnermut pisortap suliat peersitsinermut tunngasut sukumiisumik eqqortu-millu suliarineqartarnissaat erseqqissarsimagaa.
3. Suliat peersitsinermut tunngasut tamarmik tamanut saqqummiunneqannginner-minni sulisoqarnermut pisortamut saqqummiunneqartassasut.
4. “Atorfeqartitsinermik inatsiseqartitsinermi pineqaatissiisarnertit” aamma “Ingerlatsi-neq pillugu inatsisiseqartitsineq” pillugit pikkorissaassutigineqassasut. Pikkorissaanertit taakku pissuseqataat 2019-imi ingerlanneqarsimapput. Sulisoqarnermut immikkoortortaqarfimmi sulisut tamarmik, sulisutoqqat nutaallu, tamarmik peqataassapput.

[...]” (Ombudsmandeqarfimmi nutsigaavoq)

Kommuni 11. januar 2022-mi nalunaarfigaara kommunip sulisoqarnermik aqutsinermut tunngasuni siunissaq eqqarsaatigalugu suliniutai tusaatissatut tigugikka. Kommuni aammattaaq nalunaarfigaara kommunip soraarsitsinera innutaasumullu taarsiissuteqarnera pillugit annertunerusumik iliuuseqaqqinniarnga aalajangertunga.